

दिनांक 27.04.2024
समय: 18.50 बजे

आकाशवाणी जयपुर-अजमेर

प्रादेशिक समाचार

- राज्य मांय व्ह्या लोकसभा चुनाव मांय कुल मतदान 62 दशमलव 10 फीसदी मतदाता वोट दीना-8 निर्वाचन हलकां मांय पुरुषां रे मुकाबले बत्ती महिलावां वोट दीना।
- राज्यपाल कलराज मिश्र स्कूल-कॉलेज अर आला दर्जा री भणायी ने बोझिल व्हेवण ऊं बचावण सारू काम करण री जरूरत बतायी।
- प्रदेश मांय गर्मी ने ध्यान राखता थकां मनरेगा रा तैत चाल रह्या कमठाणा माथे काम रो बगत 1 मई ऊं संवारे 6 ऊं दोपहरां पाछे एक बज्यां ताई करण रा हुकम दिया ज्या।

अर

- राज्य रा कुछ हलकां मांय दिन री बगत तापमान मांय लगातार बधोतरी - अलवर, करौली, धौलपुर अर श्रीगंगानगर मांय पारो 42 डिग्री या इण ऊं ऊंचो दर्ज करी ज्यो।

000

राज्य रा 25 लोकसभा हलकां मांय व्ह्या चुनाव मांय ई दफा कुल 62 दशमलव 10 फीसदी मतदाता वोट देवण रो हक इस्तेमाल कीनो। इण मांय महिलावां ई बढ-चढ र सिरकत कीनी। वोट देवण री पात्र महिला मतदातावां रा 60 दशमलव 72 फीसदी वोट दीना। महिलावां कानी ऊं वोट देवण रो सब ऊं बत्तो प्रतिशत 75 दशमलव 75 बांसवाड़ा संसदीय सीट माथे रह्यो जद के करौली-धौलपुर मांय सब ऊं कम 47 दशमलव 66 फीसदी महिलावां वोट दीना। ई चुनाव रा दोन्यू दौर मांय मिला र 8 लोकसभा हलकां मांय पुरुषां रे मुकाबले महिलावां रो मतदान प्रतिशत बत्तो रह्यो। पैला दौर मांय चूरु, झुंझनू अर सीकर मांय जद के दूजा दौर मांय उदयपुर, राजसमंद, बांसवाड़ा, जालौर अर पाली मांय पुरुषां रे मुकाबले महिलावां बत्ती तादाद मांय वोट दीना। पुरुष मतदातावां रो वोट देवण रो प्रतिशत 62 दशमलव 27 रह्यो। बाड़मेर मांय सब ऊं बत्ता 76 दशमलव 54 फीसदी जद के करौली-धौलपुर मांय सब ऊं कम 51 दशमलव 25 फीसदी पुरुष मतदाता वोट दीना। ई चुनाव मांय ट्रांसजेंडर मतदातावां री भागीदारी ई निजर आयी। कुल 628 ट्रांसजेंडर मतदातावां मांय ऊं तीन सौ तैंतीस वोट दीना, ज्यां रो वोट देवण रो प्रतिशत 53 दशमलव 03 रह्यो। गंगानगर मांय सब ऊं बत्ता 43 ट्रांसजेंडर मतदाता जद के बाडमेर मांय सब ऊं कम दो ट्रांसजेंडर मतदाता वोट दीना। बाड़मेर, कोटा अर बांसवाड़ा मांय साल

2019 मांय व्ह्या लोकसभा चुणाव रे मुकाबले मतदान प्रतिशत मांय बधोतरी व्ही। बागीदौरा विधानसभा उप चुणाव सारू ई साढे 77 फीसदी वोट पड्या।

000

राज्य मांय लोकसभा री सगळी 25 सीटां माथे दो दौर मांय पड्या वोटां पाछे सगळा 266 उम्मीदवारां रो चुनावी भाग रो फ़ैसलो ईवीएम मांय बंद व्हे ग्यो है। चार जून ने वोटां री गिणती करी जावेला अर नतीजां रे मुजब 18वीं लोकसभा सारू चुण्या जावण वाळा उम्मीदवारां नाम तैय व्हेला। ईवीएम अर वीवीपैट मशीनां ने करडी हिफाजत बीचे संबंधित ठौडां स्ट्रॉंग रूम मांय रखवायी ज्यी है।

000

बाडमेर संसदीय हलका ऊं निर्दलीय उम्मीदवार अर शिव रा विधायक रविन्द्र सिंह भाटी वां रा हिमायतियां सागे बालोतरा मांय एस.पी. रा दपतर सामी धरणो दे रह्या है। वे ई संसदीय सीट माथे चुणाव सारू काल वोट देवण रा काम रे दौरान मारपीट री वारदातां रा मामलां मांय मुकदमा दर्ज कर र आरोपितां री गिरफ्तारी करण अर सीज करी ज्यी गाडियां छोडबा री मांग कर रह्या है। धरणो देवण वाळां री पुलिस प्रशासन सागे न्यारा—न्यारा दौर मांय व्ही बातचीत रे बावजूद खबर माण्डण तांई राजीनामो नी व्हे सक्यो हो।

000

उच्चतम न्यायालय एक खास फ़ैसला मांय वीवीपीएटी मशीन अर ईवीएम मांय दर्ज सगळा वोटां रो मिलान करण री मांग करण वाळी अर्जी खारिज कर दीनी है। न्यायमूर्ति संजीव खन्ना अर न्यायमूर्ति दीपांकर दत्ता री पीठ ओ फ़ैसलो सुणायो। जज ईवीएम माथे लगातार शंका जाहिर करणो अर निराशा रो दरसाव करण ने चुनावी प्रक्रिया मांय अविश्वास पैदा करण वाळो बतायो। अदालत कह्यो के बिना सबूत बार—बार अर लगातार शंका करण ऊं अविश्वास पैदा व्हे है।

000

राज्यपाल कलराज मिश्र चिकित्सा शिक्षा मांय आ रह्या बदलाव ने शामिल करता थकां नुवी शिक्षा नीति रे मुजब अध्यापन ने असरदार बणायो जावणो चाहिजे। वे आज जयपुर रा एक गैर सरकारी विश्वविद्यालय मांय राख्यी ज्या कार्यक्रम मांय वोल रह्या है। राज्यपाल कह्यो को सीखणो अर सिखावणो लगातार चालता रेहवे है इण ने रुचिकर बणायो जावणो चाहिजे। वे चिकित्सा शिक्षा मांय आर्टिफिशियल इंटेलिजेंस अर दूजी नुवी तकनीकां ने शामिल करण माथे ई जोर दीनो।

000

राज्य मांय 5वीं कक्षा रा बोर्ड रा इम्तिहान 30 अप्रैल ऊं सरू व्हेला। आं रा पेपर री इफाजत सारू सगळा जरूरी इन्तजामात करी ज्या है। शिक्षा विभाग रे मुजब केंद्राधीक्षक अर अतिरिक्त केंद्राधीक्षक, दोन्यू री मौजूदगी मांय ही पेपर री अलमारी खोली जा सकेला। विभाग रे मुजब परीक्षा सरू व्हेवण रा 15 मिनट पैली ही पेपर रा लिफाफा खोल्या जा सकेला।

000

राज्य सरकार गर्मी ने ध्यान राखता थकां मनरेगा रा तैत चाल रहया कमठाणा माथे काम रा टेम मांय बदलाव कीनो है। अब आं कमठाणा माथे एक मई ऊं 15 जुलाई ताई संवारे 6 ऊं दोपहरां पाछे एक बज्या ताई काम कर्यो जावेला।

000

गौपालन विभाग गर्मी अर लू रे कारण गौशालावां मांय गौवंश ने गर्मी ऊं बचावण सारू विगतवार एडवाइजरी जारी करी ज्यी है। इण मांय ढंढा सारू खास तौर ऊं पीवण रा साफ पाणी री व्यवस्था करण बाबत् कही ज्यो है। विभाग री निदेशक डॉ. शालिनी शर्मा बतायो के गौशालावां ने गौवंश सारू जरूरत रे मुताबिक पीवण रो पाणी, चारो, भूसो, ढांढां रे खाण-पीण री दूजी चीजां अर गौवंश ने गर्मी अर लू ऊं बचावण सारू छाया री पूरी व्यवस्था करण रा हुकम दिया ज्यो है। गौशालावां ने मांदी, कमजोर अर उम्मीद वाळी गायां री जरूरी सार-संभाल री व्यवस्था करण रा हुकम ई दिया ज्यो है।

ई रे अलावा मर्योड़ा गौवंश रा निपटारा सारू ई दिशा-निर्देश जारी करी ज्यो है।

000

बीकानेर रा सरदार पटेल मेडिकल कॉलेज मांय आज दो दिन रो हिमेटोलॉजी सिंपोजियम सरू व्हयो। आज पैला दिन राख्यी ज्यी वर्कशॉप मांय सवा सौ डॉक्टर बोनमेरो ट्रांसप्लांट, स्टेमसेल कलेक्शन अर ब्लड डिसऑर्डर समेत न्यारा-न्यारा मुद्दां माथे सिखावण लीनी। काल 46 पेपर प्रजेंट कर्यो जावेला।

000

पीएम सूर्य घर मुफ्त बिजली योजना रा तैत जैसलमेर जिला मांय बिजली रा 36 हजार ग्राहक सोलर पॉवर प्लांट लगावण सारू ऑनलाइन अर्जियां दीनी है। हाल ताई डिस्कॉम पोर्टल माथे 2057 अर डाकघर रा पोर्टल माथे 92 लोग नाम मण्डाया है।

धौलपुर शहर रा कोतवाली थाना हलका रा सागरपाड़ा मोहल्ला मांय बण रहया एक मकान रो छज्जो टूट जावण ऊं 11 जणा ज़ख्मी व्हे ग्या। ज़ख्मी लोगां रो जिला अस्पताल रा ट्रॉमा वार्ड मांय ईलाज चाल रहयो है।

000

धौलपुर रा सदरथाना हलका मांय आदर्श नगर कने बारात ले जा रही एक पिकअप बेकाबू व्हे र एक खेत मांय पलट ग्यी। हादसा मांय बींद रा बाप समेत दो जणा री मौत व्हे ग्यी। नीमका थाना रा झीर की चौकी मांय आज एक ट्रैक्टर ट्राली ने ट्रेलर टक्कर मार दीनी। हादसा रे कारण ट्रैक्टर ट्रॉली खाई मांय पड ग्यी। हादसा मांय 3 जणा घणा ज़ख्मी व्हे ग्या। ज़ख्मी लोगां रो नीमका थाना रा गैर सरकारी अस्पताल मांय ईलाज चाल रहयो है।

000

राज्य रा कुछ हलकां मांय लारला दिनां आंधी-बारिश रे बावजूद दिन री बगत पारो लगातार चढ़ रहयो है। मौसम विभाग रे मुजब अलवर, करौली, धौलपुर अर गंगानगर मांय पारो 42 डिग्री सेल्सियस या इण ऊं ऊंचो दर्ज करी ज्यो। केई ठौड़ां पारो 40 ऊं 41 डिग्री सेल्सियस बीचे चाल रहयो है। मौसम विभाग रे मुजब आवता 5-6 दिन राज्य मांय मौसम सामान्यतः सूखो रेहवेला हालांकि श्रीगंगानगर अर हनुमानगढ मांय आवता 48 घंटां मांय थोड़ा घणा बादळ मण्डया रेहवण अर छांटो-छिड़को व्हेवण रा

आसार है। एक और पश्चिमी विक्षोभ रा असर ऊं 29 अर 30 अप्रैल ने बीकानेर संभाग मांय आंधी चालण रा आसार है।

000

आईपीएल क्रिकेट रा तैत आज राजस्थान रॉयल्स रो मुकाबलो लखनऊ सुपर जाएंट्स सागे व्हेला। ओ मुकाबलो अब ऊं थोड़ी देर पछे लखनऊ मांय सरु व्हेला। अंकतालिका मांय अव्वल राजस्थान रॉयल्स री टीम चौथा नम्बर माथे चाल रही लखनऊ री टीम ने लारला मुकाबला मांय शिकस्त दीनी ही। प्ले ऑफ मांय जावण वाळी टीमां बीचे ठौड़ बणावण सारु लखनऊ सुपर जाएंट्स री टीम सारु ओ मुकाबलो घणो खास है जद के राजस्थान रॉयल्स री टीम रे प्लेऑफ मुकाबला खेलण वाळी टीमां बीचे ठौड़ बणावण रा पूरा आसार है।

000